

**TEKS UCAPAN DATIN SERI DR. SITI HASMAH BINTI HAJI MOHD. ALI
KAWASAN PARLIMEN PAGOH FELCRA BUKIT KEPONG MUAR, JOHOR
MAJLIS PERASMIAN PROJEK 1001 GELANGGANG RAKYAT
22 OKTOBER 1996**

1. Bagi pihak Yayasan Badminton Malaysia (YBM), saya merakamkan ucapan setinggi-tinggi terima kasih kepada Yang Amat Berhormat Dato Hj. Abdul Ghani bin Othman, Menteri Besar Johor kerana sudi bersama-sama meraikan majlis ini.

2. Ucapan penghargaan dan terima kasih kepada Yang Berhormat Tan Sri Hj. Muhyiddin, Menteri Belia dan Sukan dan Ahli Parlimen Kawasan Pagoh kerana mengadakan majlis ini khususnya bagi menjayakan Projek 1001 Gelanggang Rakyat YBM.

3. Tujuan YBM melancarkan projek ini ialah untuk memperlengkapkan kemudahan asas bagi gelanggang badminton untuk semua peminat badminton khasnya di luar bandar. Dengan adanya kemudahan ini, YBM berharap ianya akan memberi lebih banyak peluang kepada remaja kita untuk memajukan bakat mereka dalam sukan ini. Ianya juga diharapkan akan dapat mewujudkan lebih ramai pemain yang berbakat untuk dipilih bagi mengisi tempat-tempat dalam pasukan-pasukan badminton di peringkat Negeri dan Kebangsaan.

4. Ketika YBM melancarkan projek ini hasrat kami ialah untuk membina 1001 gelanggang di luar laman di seluruh negara dengan perbelanjaan RM 5,000 bagi setiap gelanggang serta kemudahan berlampu. Bagaimanapun berikutan perbincangan kami dengan berbagai-bagai pihak, khasnya dengan Pegawai-pegawai Daerah jelaslah bahawa terdapat banyak gelanggang luar laman di negara ini tetapi kegunaannya terhad oleh sebab-sebab berikut:

- a) Kebanyakan gelanggang luar laman tiada berlampu, oleh itu ianya boleh digunakan pada siang hari sahaja. Ramai yang berkerja atau bersekolah di waktu siang dan ketika balik ke rumah masing-masing, hari sudah gelap;
- b) Cuaca hujan atau angin mengurangkan pengguna gelanggang;
- c) Ramai pemain yang berpotensi tiada matlamat untuk meneruskan permainan ini secara serius oleh kerana tiada latihan tertentu atau pertandingan bagi bakat-bakat mereka dikenalpasti dan dimajukan lagi dalam permainan ini.

5. Setelah mempertimbangkan perkara-perkara di atas, maka YBM menetapkan supaya ia bekerjasama sepenuhnya dengan Ahli-Ahli Yang Berhormat untuk melaksanakan projek ini di kawasan parlimen masing-masing.

6. Satu perjumpaan telah diadakan dengan Ahli-Ahli Yang Berhormat Parlimen daripada Barisan Nasional bagi membincangkan langkah-langkah yang perlu diambil untuk melaksanakan projek ini.

7. Setelah perbincangan diadakan, Ahli-Ahli Yang Berhormat memberi sokongan sepenuhnya terhadap projek ini dan bersetuju bahawa:

(a) Sekurang-kurangnya satu gelanggang nukleus dibina di setiap kawasan Parlimen. Ahli Berhormat berkenaan akan mengenalpasti tapak yang sesuai untuk membina dewan itu melalui Pegawai Daerah masing-masing.

(b) Tujuan projek ini bukan sahaja untuk memperkembangkan permainan badminton bahkan ianya akan dijadikan satu saluran untuk kerjasama dan perpaduan antara semua kaum di satu-satu kawasan serta memberi harapan kepada muda-mudi.

8. Klinik-klinik kejurulatihan dan pertandingan akan dianjurkan di dewan-dewan nukleus ini untuk memberi galakan kepada muda mudi. Persatuan-persatuan badminton Negeri akan bekerjasama dengan Ahli-Ahli Yang Berhormat bagi memastikan projek akan berjalan dengan lancarnya.

9. YBM berharap akan dapat membina seberapa banyak dewan nukleus ini pada tahun 1996 supaya ianya boleh menganjurkan satu pertandingan untuk pasukan-pasukan Ahli-Ahli Yang Berhormat sahaja pada tahun depan. Pemenang pertandingan ini akan menerima hadiah wang tunai yang lumayan serta hadiah-hadiah yang lain. YBM berharap ianya akan mewujudkan satu persaingan di antara pasukan-pasukan supaya setiap pasukan akan berlatih bersungguh-sungguh bagi memenangi pertandingan. Ini akan melahirkan lebih ramai pemain-pemain yang berpotensi untuk negara.

10. Kita juga mengharapkan sokongan daripada rakyat yang cintakan badminton untuk membantu projek ini. Pemaju-pemaju perumahan boleh memastikan bahawa satu dewan nukleus dapat didirikan di kawasan perumahan masing-masing. Begitu juga, kita mengharapkan Kumpulan-kumpulan Peladang akan dapat menyediakan dewan-dewan ini di kawasan-kawasan ladang mereka. YBM akan membekalkan mereka dengan perkara-perkara teknikal yang perlu dalam mendirikan dewan-dewan nukleus. Adalah menjadi impian kita untuk melihat dewan nukleus ini dibina di setiap kampung dan sekolah pada masa akan datang.

11. Badminton merupakan satu sukan yang pernah kita menjadi jaguh dunia dan masih mampu untuk terus menjadi jaguh dunia. Persembahan kita baru-baru ini dalam Olimpik jelas menunjukkan kebolehan kita. Kita perlu menyediakan lebih ramai pemain yang berpotensi dan untuk tujuan ini kemudahan-kemudahan yang sesuai amat penting. Kita juga mengharapkan sokongan yang positif daripada akhbar, radio dan televisyen oleh kerana mereka boleh menggalakkan orang ramai bersama mengambil bahagian dalam Projek 1001 Gelanggang Rakyat ini.

12. Saya merakamkan ucapan terima kasih YBM kepada Kerajaan Negeri Johor, semua penaja kita, Pegawai Daerah Kawasan Muar dan pegawai-pegawainya dan mereka yang telah membantu sedikit sebanyak dalam menjayakan majlis kita ini hari ini. Sekali lagi ucapan terima kasih saya kepada Yang Amat Berhormat Dato' Hj. Abdul

Ghani Menteri Besar Johor dan yang Berhormat Tan Sri Hj. Muhyiddin, Menteri Belia dan Sukan dan semua yang hadir. Tanpa kerjasama mereka kita tidak akan mencapai kejayaan seperti hari ini.